

Parke Tirakochi na Savaneta



For di 1973 un ex-Maestra, sra Maria van der Linden di Savaneta tabatin un soño. Un soño cu un dia e muchanan di Savaneta en particular y di Aruba en general lo por goza na nan antoho di un parke di recreo. A logra forma un comision, recauda fondo, pero pa diferente motibo e.o falta di tereno y otro donantenan e fundacion no por a realisa su meta. E actividadnan a disminui di tal forma cu hasta e fundacion a stop di existi

Cu tempo e necesidad pa un parke di recreo a bira mas grandi ya cu hasta e scolnan ta carece di e facilidadnan mas basico y elemental di recreo. E desaroyonan riba otro tereno si no a keda atras. E modernismo tin como consecuencia cu nos muchanan mas y mas tin television y weganan di video como un forma alternativo di recreo. E pasividad cu ta inherente na e forma di recreo aki naturalmente no ta benificioso pa e desaroyo di e mucha. E señora ex-maestra aki no a bandona e idea. El a bolbe acerca otro personanan hoben y cu ayudo di mas personanan a base boluntario a tuma e pensamiento aki over cu mester realisa mas pronto posibel un parke di recreo pa e mucha. A cuminsa move y a lanta "Fundacion Grandi Pa Chikito di Savaneta" dia 5 di november 1991, cerca Notario mr. F.E.E.. Tjon-Ajong, cu a start cu un bon capital ya cu:

1. e fondonan di e otro fundacion cu de facto tabata likida a wordo pasa p'e
2. e "Comision di mayor di Prome Paso Kleuterschool", comprendiendo balor di un parke di recreo, a aporta cu un bunita suma.
3. Sr. Kenny Theysen (+.) pa su enorme aporte sin su energia y su experticio e fundacion no por a logra e meta.

E capital aki a facilita e desaroyo di e proyecto ya cu e a habri caminda pa busca e co-financiamiento cerca Cede Aruba cu por lo general ta financia e tipo di e proyectonan aki. Puntonan di salida pa cu desaroyo di e proyecto tabata:

1. e proyecto mester ta realisabel esta pagabel;
2. e ekiponan mester ta di bon calidad, duradero y ta rekeri poco mantencion;
3. e parke mester cumpli cu e condicionnan basico di un parke di recreo moderno;
4. e flora mester ta local.


Di Obispado di Willemstad e fundacion a haya e tereno patras di Prome Paso Kleuterschool den bruikleen cu e derecho di opstal. A opta pa e tereno aki ya cu e ta den cercania di e scolnan y ta suficientemente grandi. Tambe a tene cuenta cu e tabatin un cura y otro facilidadnan locual a baha gastonan di inversion. E ekiponan a wordo busca na Landscape Structures Inc. Na Merca: esaki debi cu na Aruba (Y.M.C.A.) ya tin bon experencia cu e tipo di ekiponan aki. Den e planeamento di e parke y compra di ekipo a tene cuenta cu diferencia di edad. Tin un seccion special pa e muchanan te 6 aña y un pa 13 aña. E ekiponan ta masha varia manera, schommel, wipwap, glijbaan, cabayito etc. Tambe tin un asina yama "fitness cluster" unda e muchanan te 13 aña por haci diferente ehercisio manera, push-ups, sit-ups,

rekmento y balansamento. E ekiponan aki indudablemente lo yuda e muchanan den nan desaroyo motorico. Fuera di e ekiponan di hunga e parke tin tur facilidad manera baño pa chikito y grandi, un afdak grandi cu banki, watercoolers etc.

Maske e fundacion tabata dispone di un bon capital na efectivo, nunca e lo por a realisa e proyecto aki sin e aporte di otro instancianan. Pesey a acerca diferente donante cu semper tabata masha receptivo. Asina e fundacion por a firma dia 21 di december 1992 un acuerdo di co-financiamento cu Cede-Aruba pe suma di f. 115.827,=. Gobierno di Aruba tambe a mira e importancia di e proyecto y a pone f. 25.000,= disponibel for di fondonan di e Ministerio di Bienestar General y di e Ministerio di Trafico y Comunicacion. Ya cu a pone enfasis den e plannan ariba e mehoracion di e desaroyo motorico di e mucha y teniendo na cuenta cu esaki ta e base y ta di vital importancia pa un mihor desaroyo deportivo e Fundacion Lotto pa Deporte tambe a inverti f. 12.000,= den futuro di e muchanan. Aparte di e donantenan grandi aki tabatin hopi otro persona, comerciante etc. cu a aporta. E realizacion di e parke tabata pues posibel mediante un cooperacion unico unda iniciativa particular, Gobierno di Aruba y di Hulanda (mediante Cede-Aruba) a sabi di aporta segun nan forsa. E parke a rekeri un inversion na efectivo di ± f. 170.000,= den equipo di hunga so a inverti f. 118.000,=, excluyendo derecho di importacion y gastonan di instalacion. E ultimo aki a costa f. 21.000,=. E otro gastonan (trahamento y mehoracion di facilidadnan, inventario, accountant etc.) ta wordo calcula na f. 31.000,=

E trabou a wordo hasi pa Camar N.V. Durante e periodo di construction a tene un encuesta den e muchanan di Prome Paso Kleuterschool y Heilig Hart College pa presenta un number apropiada pa e parke. For di e tantisimo inscripcionan a scohe e number "Parke Tirakochi" ya cu e parke a bin na e lugar na unda e muchanan pa falta di material adecua di recreo mester a contenta nan mes hungando cu tirakochi cu tabata na abundancia na e lugar ey. Shantamay Yarzagaray a gana e encuesta cu e bunita number "Parke Tirakochi". Nan a gana un parke moderno pero a perde e lugar unda nan ta rondia tirakochi.

Despues di hopi lucha, sacrificio y frustracion e parke di recreo di mucha na Savaneta a bira realidad. E la habri su porta diabierna 1 di oktober 1993 pa 4.30 p.m. dor di e ex-maestra y un ciudadano di Savaneta hopi kerida pa e muchanan di scol paso e tabata semper pendiente di nan. Pastor di Savaneta, Pastoor Juancho, a bendiciona e parke, den presencia di Deputado Sr. Fredis Refunjol.



Den vakantie di aña 1995 Parke Tirakochi, trabounan di mantencion manera cambia santo, verf dak, pone y corta mata a tuma lugar. Tambe a traha un Kiosko cu ayudo un biaha mas di Cede-Aruba. Parke Tirakochi ta cobra pa fiesta pa mucha f.150,= pa dia, inclui 2 mesa y bo ta haye limpi, pa scolnan nos tin un prijs di f.2,= pa mucha.

Historia di e fundacion: Nombenan di miembro di Fundacion Grandi pa Chikito di Savaneta ta : directiva Flora Koolman presidente pero despues di 3 aña a baha como presidente y a wordo remplasa pa Marlin Theysen y despues Ingrid van der Linden. presidente di e fundacion. Monica Ras ta tesorera te cu fecha y Mervelin Ras ta secretaria te cu fecha di e fundacion. Como miembro nos tawata tin Shila van der Linden, Carmen Werleman, Marlene Maduro, Mimi Koolman, Marjorie Schwengle, y Marlin Theysen. Actualmente e fundacion ta conta cu solamente e directiva den nomber di Ingrid van der Linden, Monica Ras y Mervelin Ras.

Parke Tirakochi tawata habri tur dia pornada pa mucha di 4.or pa 6.30 di atardi pero actualmente Parke Tirakochi no por ofrece e servicio ey mas pa falta di miembro voluntario y di fondo. Actualmente e scolnan basico y kleuterschool di Savaneta ta haci uso di e parke tur dia. Parke Tirakochi no ta haya ningun subsidio y e parke tin su gastonan.

Directiva di Fundacion Grandi pa Chikito di Savaneta lo sigui cu nan trabao voluntario sin ningun interes personal, pasobra nan sa cu e mucha ta fundeshi di futuro di mundo. Nan sa cu hungamento ta esencial pa desaroyo di e mucha. Nan sa cu hungamento ta yuda e mucha desaroya fisicamente, mentalmente, emocionalmente y socialmente.

Parke Tirakochi ta ofrece e ambiente caminda e mucha por explora y siña, topa otro mucha y disfruta di sentimento di libertad. E grandinan di awe mester yuda forma e chikitonan di awe cu mayan na nan turno mester percura pa e chikitonan y e mas grandinan.

Dufi Kock

Escritor y Historiador

Savaneta 125-F

Tel: 584-1201

Cel: 592-9417

dufikock@gmail.com

Lid in de Orde van Oranje Nassau 2006

6 di januari 2016